

Nº3, mes-shi 2014

Jiva

- Jiva on dale islas
- Lidepla on Luna
- Senu de jiva
- Foto de gwer-trefen urba
- Ganas do luba



Swasti!

Nu joi por snova mog saluti yu!

Walaa tri-ney chuka de “Jiva”. Pa sey ves nu he trai shwo om zuy muhim, zuy eterne kosas kom luba e arta, e yoshi om ley kontrakosa to gwer.

Si yu yao ke in sekwe chuka nu publiki makala o leta skriben bay yu, dan sendi ba it a nu, via FasKitaba o via Lidepla-sait.

Hao lekting!

Lidepla-sait: <http://lidepla.org>

Lidepla in FasKitaba: <https://www.facebook.com/groups/lidepla>

Lidepla in VK: <http://vk.com/lingwa>

Lidepla in LJ: <http://lingwadeplaneta.livejournal.com>

Jawaba a pazla e enigma (paja 14)

1. luba, arta, jen, gwer, hunga, kisa, salam, amiga, kreda, hena, lyansa, religion, filosofia, taim, spas, haotaa, veritaa
2. luba, amiga, arta, haotaa, religion, veritaa, filosofia, lyansa, kreda, nada
3. (horizontal) rude, ktrona, tokon, brancha, grin
(vertikal) riza, tronka, bush, hwan, brun
4. a) Li go pa fila, un afte otre; b) Pa klok 12 de nocha surya sempre yok; c) Giasa es ya vakue, also nuta yok.

Natalia Konshina

Jiva on dale islas



Jenta in Europa, li oftem opini ke li hi es «blan rasa», sivilisi-ney jenta do gao kultura. E habiter de osea-ney islas e syao vilajas, li muka es primitive. Es aika priate tu dumi tak, fogeti-yen oli problema e beda de «sivilisi-ney jenmines», oli ley violensa e pagalitaa, finansa-ney juling kel kausi hunga in tote landas etf.

Al nau nu (*autor e familia*) habiti on Markis islas in Kyete Osea. Hir jenta jivi haishi hampi tak komo oni gwo jivi hir mucho yar e sekla bak. Wel, sertem, moden islajenta go a shop fo kupi ovo in pak do 12 ge, Arhentina-ney kokmasu e USA-ney govamasu, e kindas go a franse skola. In ley dom, osobem in shefurba pa isla Nuku Hiva, ye menga moden el-mashina e plasma-televisor. Li selfa muvi tra isla aika lanem al raki jip Toyota. Yedoh li haishi shikari, para ves per mes, den ti jivi in montas na bakras, shikari kun banduk o, si mani fo banduk yok, kun dogas; li haishi fishi, e li haishi adi kokosamilka a dish do bakramasu o do mar-fan. Li he bikam aika lan e nomuvishil: sol in yungtaa manes es slim e muskulaful, e afte ateni 40 yar maiste man mah-kresi gran duza e bikam gro-sidishil, al preferi observi sirkum-munda fon byen loko.

(lekti for pa paja 6)

Lidepla habar



Lidepla in arta-proyekta



Pa sey saif in Sietl (Seattle), USA, oni fai artista-kompeta, al ke jiter muka ve flai a Luna fo realisi swa-ney projekta.

Jiter de kompeta Nevdon Jamgochian proposi zwo osobe Luna-vikla kun 3D-printer fo zwo syao kopias de yus-ausmorten animal de Arda. Nevdon plani plasi on toy Luna-vikla den plata kun lidepla-texta de poema bay Persi Shelli (Percy Shelley) “Osimandias” (“Ozymandias”). Yoshi ta plani fai osobe Luna-ney seremonia pa lidepla, kel ve gei transmitti a oli landa de Arda.

Planen datum de kosmo-safara muka es mes-sem, 2016.

Fo pyu info kan makala bay Nevdon pa sekwe paja.



Nu pai leta

Respekten kreter e yuser de Lingwa de Planeta!

Me joi gro por findi Lingwa de Planeta. Me es esperantista duran mucho yar. May anubav shwo ke interjenmin-ney lingwa mog funksioni hao e ke mucho jen bu kredi to o bu yao dumi om to. Yedoh me hi es jen kel jan i bay kapa i bay kordia, ke interjenmin-ney lingwa mog bikam vere parta de jiva - mah-joi-she, mah-kresi-she, stimuli-she parta.

Me tamani a Lingwa de Planeta fule sukses. Me nadi partisipi in kresing de lidepla al ke me kontinu yusi esperanto.

Kelke info om me: me es USA-man do 71 yar. Me fai interes om lingwas, kulturas e religiones de munda, natura, developa de landas e texing.

Swasti!

Erik Felker

In Bharat grupa de spesialista zai zwo videos fo ke kinda mog lerni lekti. Kada video es bulonge kartun kun subtitla. Ye yo video pa menga farke lingwa. Depos sey saif oni zwo video pa lidepla toshi.

Lidepla in Bukbox



<http://www.bookbox.com/>

Al nau ye char video:

“Un-ney kwan” (<https://www.youtube.com/watch?v=ZN3VLBsJOCl>)

“Zuy gran tresor” (<https://www.youtube.com/watch?v=PF19XXVFjH0>)

“Char amiga” (<https://www.youtube.com/watch?v=JNe-Ii9OkNI>)

“Syao pianista” (<https://www.youtube.com/watch?v=GtfJSz3uzYE>)

Nevdon Jamgochian

Lidepla on Luna



Munda he shanji drastikem duran laste 50 yar, bat afsos profetas bu ko-shanji. Pa beginsa de moden epoka, kultura shanji pa kway e garibisi-she dao; oli arta e vigyan reakti a to bay trai sintesi den brutalitaa de mashina-ney sekla inu formas kel mah toy shanjing samajibil e jenlik. Radikale ideas de sertene grupas inspiri jenta tu bi bu sol pasive viktima de nove sekla bat tu drimi – tu drimi om nove modus de jiving e om pyu jenlik interakting kun garibe realitaa. Sertem, mucho drima fai fiasko – bat ob nu’d mog hev magnifike atena bay Yuri Gagarin o bay Martin Luter King sin toy drimer kel inspiri jenta tu kan pyu dalem kem kicha sirkum gambas?

Por koy kausa, nuy nove epoka de sarwem aksepten materialisma, it mah maiste intele menta aspiri a egoistike gola. In kasu de vigyan, maiste jen zai gun bay kompa-ki dabe gwin mani. In kasu de arta, artista pinchanem zai kan inu swa e bu gwansi sosietaa.

Nodavem, me he jiti kompeta om zwo arta-guntura on Luna. Obwol kompeta es sim reklama fo “Virgin Galactic” Kompania de Ostralia-ney miliarder Richard

Branson, e es shao-probable ke arta-guntura on Luna realifi, me hi fai-te fule gambirtaa om kompeta. May idea es ke oni treba pushi jenley avan, versu sarwe sirkum-milyoo-ney moral e samaja.

May idea es tu instalati un Luna-vikla, kun un 3D-printer montiren on uupara. Sey vikla wud bi konekten kun dale kontroli-stasion on Arda. Afte ausmorta de eni animal-spesia, stasion wud transmitti komanda a vikla tu printi un syao statua de yus ausmorten animal. Poy kamera wud transmitti imaja de statua a Arda. Gola es tu mah-shami oni e also mah oni suluki pyu hao; sikom seblem oni atenti mucho pyu den to ke eventi in kosmo kem to ke eventi on Arda.

Al nau ye pyu kem 2000 animal in lista de kritikem ugrosi-ney spesia. Sey lista fa-gran pa exponenta. Afsos, sey stay e masive extirpa de jiva-formas on Arda, oni



Autor
in kosmokostum

Luna-vikla
kun 3D-printer



Osimandias

Me miti wandi-sha fon landa dal gulao.
Ta shwo: in sahra dar, on ramla-ney surfas
Dwa ston-ney gamba stan, sin tronka, gran e gao.
Bli li, haf-sinki-ney, zai lagi kreken fas.
Sey ston-ney fas do fruna es gamande,
It shwo: es jen do lenge emosion,
Abyasi-ney a moki e komandi.
In ston da skulpter stampi-te pasion.
Ye word' on pedestal kel zai dekad:
"Me, Osimandias, zuy mahtaful in mund'.
Kan may gunturas, oo yu regas, e denadi!"
Ye sirkum nixa hi bli toy ruina-resta,
Sinfin-ney ramla sol pa oli char taraf,
Sinjen-ney sahra sol pa esta e pa westa.

atenti it ga shao, obwol, segun maiste vigyaner, es komparibil a laste masive ausmorta do Pleistosen era.

On toy Luna-vikla wud ye skriba de poema "Osimandias" bay Persi Shelli, do yar 1808. It temi om ke nixa bilden bay jen es permanente; se anshi ke sirkum-milyoo-ney damaja es sole kosa kel duri for. Toy poema wud bi skriben pa lidepla, sikom sembli a me ke lidepla-grupa es un de shao progresivem dumi-she jenvigyan-ney grupa do sedey. Sarwe samaja de humanitaa es sole kosa kel helpi nu muvi avan, versu pyu hao munda.

Al nau me zai exposi may idea in farke landas. Zuy nodavem, in agosto, me hev-te arta-ney exposa in Hayastan-ney (Armenia-ney) Nasion-ney Galeria de Moden Arta. Me zai fai intershwosa om bringi sey exposa a Jungwo, Hanguk e Frans. Pa same taim, me zai instalati metal-ney platas sirkum ardagloba (yus he instalati un-la in Tai), kun toy poema pa lidepla e pa lokale lingwa, on bildura kel-ney poseser konsenti. Me zwo se al onhev may kosmokostum, sikom to atrakti pyu atenta a proyekta e evidentisi toy idea ke sey planeta es sole hi planeta ke nu hev. Si nu findestrukti Arda, nu bu ve mog go a eni otrelok.

Me'd yao danki lidepla-grupa por helpa om may arta-proyekta. Me nadi ke lekti-sha kontakti me, dabe me mog go a ta-ney landa fo exposi may guntura o fo instalati lidepla-ney plata in ta-ney urba. May e-meil es: nevdon@gmail.com

Nasion-ney Musey de Moden Arta in Hayastan: <http://hetq.am/arm/news/55906/hrushak-khoher-vasn-orkori-panteon-lusni-vra-cucadrutyun-zhamanakakic-arvesti-tangaranum.html>

Kompeta: <http://w3seattle.com/blog/walking-on-the-moon/>

Sait de "Virgin Galactic": <http://www.virgingalactic.com/>

Nevdon Jamgochian es USA-ney artista kel jivi in Tai. Ta gwo exposi in Europa, Asia e Norde Amerika.

(“Jiva on dale islas”, beginsa pa paja 2)

Naturalem, kem pyu dalem fon sentra, tem pyu pa un taraf mushkile, pa otre taraf naturale ley jiva es. On otre 5 isla de Markis islalot, wo bu ye mucho administrasion e ergo bu ye mucho mani, jenta jivi pyu povrem e pyu blisem a natura. Dar oni fai pinchan Polinesia-ney zunsu: kopra*-jaming, fishing, shikaring.

In dale vilajas manes es pyu slim e pyu energike, al ke ginas olilok es aika grose: yo al skola-yash gelas akwiri fulitaa de korpa-formas kel tendi chu aus panta e jupa si it es tro tange (por koy kaprisa de poseserina).

Pa skola, franse talimer oftem bu sta santush om swa-ney lerner. Markis-yungas rarem expresi aspira a akademike jansa. Li apena en-domini franse

* kopra - suhisi-ney kokosa-kerna aus kel oni zwo kokosa-olea



gramatika, koy kindas bu mog lekti hao iven al hev 9 yar. Segun opina de grumblishil franses, Markis-jenta

es lan, karke e sintalim-ney. Koyves tineijer bu yao go a kolej, e li oftem shwo karkitaa a samyashwan e a talimer. Janmer pinchanem bu gro-kuydi om suluka de swa-ney kinda kel kresi in gran familia ga librem, pa vilaja-ney modus. Si koywan wud kwesti tal “kinda do natura” om hu eduki ta, ta wud shayad jawabi kom Pinokio: “koyves papa Karlo, koyves nulwan”. Yungos fai piing, fumi herba, go fishi, fai kompania, kuri yunginas, - generalem, segun opina de adultas, li zwo ga nixa. Li fai nixa-zwoing aika longem, sirke til yash do 23 yar. In loko wo chia kresi pa baum, lopi in monta e swimi in mar, sosietaa es indulgishil; yoshi Frans-ney mani-helpa lasi oni duyfu hao, also adultas bu fai tro-ney instrukting an yungas e per-miti li jivi swa-ney prope jiva.



Ewalaa poy, al yash de 22-24 yar, eventi koysa ga no probable segun logika de eventa-developa - nu vidi ya, ke duran bifoo-ney yares fa-formi lannik e singunnik. Yungo turan en-fai interes om arta. On islas arta es tatuing do jatile rasma, ston-ingraving, osta-ingraving, zwoing de souvenir aus ligna e de dekora aus ston e baum-semena.

Also yeri-ney nulkapnik begin rasmi, ewalaa suy kalam mah-ye perfekte rasma do isla-tradision. Oda ta begin fai tatuing (kel es do gao demanda on islas) on korpa de samvilajer, e suy fantasia kreati tatu kel sekwi lokale tradision. Oda ta reveli in swa vokasion a skulpting e pasi mucho ora kun katitul e ligna-pes. Afte kelke taim ta en-hev familia e kombini swa-ney kreative gunsato profesion kun fishing e shikaring. Se permeti manteni familia.



Kreativita de islajenta mah oni admiri. On isla Fatu Hiva hampi in kada korta ye master kel zwo kosas, miden kel zuy-hao-las meriti gei nami arta-guntura. Vilaja-man kel apena mog skribi, li ordi-kupi fon Frans den osobe tul fo begun osta e ligna. Li hev osobem ekipen gunshamba in garden-domkin. Li shuki ston-ney e ligna-ney pes do treba-ney forma e struktura al fai aika mushkile wanda in dense shulin. Rasma in dekora e skulptura mah oni astoni por jamilitaa.

Unves nu desidi fai promena pa vilaja e go tanto dalem inu it, ke kamina bikam daokin e savaje kokinas bikam tanto nagle ke un-la ataki Polina (*docha de autor*) afte ke ela en-lopi versu yunkoklot. Turan nu en-vidi korta in kel jenta zai mavi a nu amigem. Un syao gela in-diki Polina bay finga al shwo elay nam. Toy gela fa-reveli Polina-ney samklaskinda, e elay patra, masta de korta, fa-reveli ga merkival jen. Oni inviti nu inu dom, en-ye toka, e nu en-jan ke Didu fai interes om historia de Markis islas e jan mucho detal om visita de ruski Krusenshtern. Ta tuy bringi kelke grose historia-kitaba al grumbli-afsosi om ke franses bu yao ke oni jan om toy historike visita de ruskis, om ke pa fakta toy hi visita deskovri Markis islas fo munda, via skribas e rasma zwo-ney bay tim de Krusenshtern-ney ship.

Yoshi fa-reveli ke Didu fai skulpting. Wen nu vidi suy gunturas, nu fa-astoni gro. Simple vilaja-man ke nu miti ga kasulem al fai promena, ta zwo aus ligna den zuy jatile

forma e linia do exakte proporsion e do riche fantasia.

Yoshi nu merki ke Markis-jenta hev pasion a musika. Laojenta shakwi om ke yungas lusi interes om tradision-ney musikatul “ukulele” to syao gitara, aika populare on islas de sude parta de Kyete Osean. Bifooen muka ol vilaja gwo jami-lai fo baji ukulele, kadawan bringi swa-ney prope musikatul, zwo-ney aus hole baum-tronka, do primitive syen, e duran oras jenta baji e gani pa swa-ney lingwa, al ke koy ganas es inventi-ney bay gani-sha e koy otores es pasi-ney fon prajenta. Nau muka yungas nichlodi musika fon internet e lusi interes a isla-ney gitara.

Nu fa-impresi bay kushalita kun kel islajenta domini sey musikatul. Maks (*mursha de autor*) shwo ke zuy hao bajer meriti fai parta de moden Europa-ney bandas. Nulwan de li gwo lerni musika, sikom musika-lerniguan on islas yok. Bat luba a musika mah li tamrini duran mucho ora. Nulwan de li jan notas; gana-textas gei pasi fon generasion a generasion; yedoh koy musiker baji kom vere virtuos. Gitara ukulele, it ye in kada familia. In kada vilaja ye un o pluri master kel zwo musikatul, lubi-shem dekor li bay jamele rasma, mah-glan e laki.

Mucho islajen gani gro-hao. Pa musika-festival nu gwo vidi komo pluri nuy koniwan to bisnesjen, fisher, talimer, li lai a skena e fai ga hao ganing.

Yoshi un pasion de islajenta es tambur. Kada tambur es dekoren kun gro-kuyda, e maiste man janmog baji it.



Tambur akompani oli seremonia; oni fai lokale danza toshi al tamburing. Mucho kinda visiti kursa de tambur-bajing. Duran festa o koy komune eventa oni oftem mog vidi kinda kel zai stan bifoo swa-ney tambur duran oras, e baji it fon taim a taim wen treba.

Me es ga serte ke koy interne aspira a arta ke oni merki she populasion, it diki sertene jivishiltaa de lokale sosietaa. Malgree ke “pyu sivilisi-ney” franses prohibi-te ley kultura duran hampi un sekla, jenta kipi in genes den inkлина a swa-ney prope tip de kreating. Temas e motivas lai fon tradision, e yaosa de kreati, it lai fon inen. Segun me, sey yaosa es axa-si de sosietaa-ney exista e developa.

Fo me es ridival tu audi fon sertene blan jenta den gamande shwotura om Polinesia-jen kel muka es savaja, bu dalem goney fon jen-chiing. Speziale statistika yok, yedoh

namba de arta-master per mil jen on islas es sertem mucho pyu gran kem in eni Europa-ney urba do menga arta-lerniguan. Wud bi hao fo blan gamandenik tu kaulu se. Verem, bu gai fai gamanditaa versu jenta do otre kultura e historia.



Filippo Zanoner
Sensu de jiva



Kare amigas! Kwel es sensu de jiva? Walaa zuy simple e kurte jawaba: sensu de jiva es lyansa. Ob tro shao? Ver.

Me repeti, sensu de jiva es luba: solidaritaa, amigitaa, aktivitaagolen a komune haotaa. Bat to es sol jiviregula. Ob yoshi kausa?

Kada filosofia e religion dai swa-ney jawaba, al lyu yedoh den vaste plasa a misteria.

Segun kristakreda, luba es sursa e gola de jiva, also kausa toshi. Individuale jiva es expresa de universale jiva, kel existi ausen spas e taim, e it es destinen fo ateni stasa ausen spas e taim. Luba jivi eternem.

Ob es fantasia?

Fon Letas de Yohanes (leta 1, parta 4)

7. Karas, nu lubi ba mutu, sikom luba es fon Boh. Kadawan kel lubi, ta es janmen bay Boh e ta koni Boh.

8. Wan kel bu lubi, toy-la bu koni Boh, sikom Boh es luba.

9. Luba de Boh a nu manifestifi-te in ke Boh sendi Swa-ney unike Son a munda, dabe nu mog jivi bay Lu.

10. Luba bu es ke nu he en-lubi Boh, bat es ke Lu Selfa en-lubi nu, e sendi Swa-ney Son komo auskupi-she kurban pur nuy gunahes.

11. Karas, si Boh en-lubi nu tanto gro, dan nu toshi treba en-lubi mutu.

12. Den Boh nulwan neva gwo vidi. Bat si nu lubi mutu, Boh jivi in nu, e Luy luba perfektifi in nu.

Me dumi ke temi sol om dao fo expresi toy idea, mogbi bu hao-samaji-ke, kel trapasi limitas de komune anubav, bat semblem bu kontradikti logika e vigyan. Me kredi ke mog existi realitaa ausen spas e taim. Ye «bia» in swa selfa, «veritaa» in swa selfa.

Matematike kanunes es absolute veritaa. Tote pasiwat, ke oni neva mog fulem jan, oltaim zai glidi aus taim, dabe zin bushanjibile stasa kel simplem «ye», obwol buatenibile, e kel es veritaa in swa selfa. Spirituale jen-ney jivika toshi ve zin toy stasa: de «eternitaa», de salam e joisa fo haotaa-zwo-sha.

Si to es sol fantasia, hay it ye. Nu treba fantasia e poesia toshi. Nu bu gai negi realitaa de koysa sol bikos it es misteria-ney. Nu mus rekoni ke jen-ney menta, obwol it oltaim reveli «misterias», it miti bupasibile limita. Lo muhim es kontena de Krista-ney mesaja: zwo lo hao, akti pro komune haotaa.


Sertem, oni zwo haotaa bu sol dabe pai ausen-ardaney rekompensa: oni senti ke to es naturale deba. Nu nami ya simplem «jen-ney» o «humane» den suluka kel inspiri mutuale samaja e solidaritaa de jen. Also bu mog ye farka inter kreder e bukreder. Nu jui hao e jamine kosas tem pyu si pa hunta (iven fule sex-juisa demandi para), nu jui al deskovri novika, al kreati. Ob se olo bu es toshi expresa de luba?

Luba e ko-senta, bu sol jen, bat yoshi animal jan li. In kelke experimenta, rata plurives librisi otre rata fon plen. Sey suluka es resulta de pure ko-senta, bikos rata to helper bu pai eni profit fon suy helpa.

On testalok, biologier plasi dwa rata. Un rata es relativem libre, e otre-la es klosen inen tange travidibile silinda. In silinda ye dwar, bat oni mog ofni it sol fon ausen.

Libre rata, afte mucho proba, pa fin pai ofni dwar e librisi kompanion.

Wen oni repeti experimenta, rata to helper librisi kompanion hampi tuy.



<http://www.youtube.com/watch?v=WzE0liAzr-8#!>



Returni-yen a jiva-suluka. Un-ney e fundamentale deba: tu lubi. Un-ney e fundamentale raita: tu gei lubi. Den to oni wud mus skribi in beginsa de stata-kanuntot, de partia-regulatot, de kada jen-ney regulatot.

Kontrem, eni manifesta de hena, egoisma, egalsentitaa e osobem violensa, it wud mus gei senti kom nojen-ney, nafre, skandal-ney, muaki-she.

Sertem, me bu shwo koysa nove. Me bu opini swa kom filosofier o profeta, yoshi meno kom musta de krednik. Yedoh me wud yao mah yu atenti den uuparenshwo-ney fundamentale deba e raita. Li neva gei atenti e evidentisi sufi-shem, e to sembli a me muy strane e afso-sival.

Pa konklusa, si bu oli jen mog konsenti om sensu de jiva, hay nu konsenti amini om toy dao kel dai sensu a jiva: dao de salam, solidaritaa, amigitaa. Brevem, dao de luba.

Amigas! Me wud yao jan yur ideas om se. Skribi ba li!

Swasti a oli!

Foto fon gwer-trefen urba

Walaa kelke foto fon Pervomaisk, bugran urba in Lugansk region (Donbass). Inglish jurnalista Grem Fillips (Graham Phillips) fai sey foto pa dey 16 mes 9 yar 2014 e posti li in FasKitaba kun shao kommenta. Ye darfa tu ripubliki li.



Me shwo-shwo duran haf-ora kun laoginas in Pervomaisk. Li hev nixa, nixa hi — nul mani, ras-bombi-ney flat, apena basta fan; li garmi akwa bay agni bli bombi-refuja wo li jivi.

Yedoh li dai a me — li insisti-dai a me — un gran bao de walnuta, e li refusi pren mani pur it. Osobe jenta.



Nullok es pyu bade kem in Pervomaisk. Ukraina-ney trupas kel muchofai pa kelke kilometra fon hir, li pluvi-bombi urba, pyu kem sto sivila es kili-ney. Domes es destrukten, den pension oni bu pagi, elektritaa yok, akwa yok. Pyu kem 10 mil jen es haishi in urba e zai trai ausjivi.



Walaa komo oni kuki deyfan in Pervomaisk.




Pervomaisk pa sey aksham, sirke 70 jen zai refuji in skola-ney sporta-sala duran ke Ukraina-ney artileria zai bombi urba.

*Sikom tema de un makala es luba, walaa kelke
jamilé gana do same tema, tradukten fon farke ling-
was (espaniol e hindi).*

Kisi me mucho

Kisi ba, kisi me mucho,
mogbi sey nocha es laste, it bu ve lai pyu.
Kisi ba, kisi me mucho,
Me ya zai fobi, zai fobi ke me lusi yu.

Yao ke yu es muy blise,
yao kan-kan yur okos, senti yu ga bli swa.
Dumi ba, mogbi yo manya
me es muy dale, muy dale fon yu.



Okos yur

Okos yur - in li
ajibe-si, ajibe-si ye koysa.
E yur spira mah may kordia hovi, ga kom kait flai por joisa.

Sey nocha he lai, in kel me sta gro-felise.
Wan luben fon dalitaa, ta es a me blise.
Treba shwo tanto mucho bat haishi ye kwesta in kordia may:
Kwo me drimi oltaim, kwo me yao oltaim - gai shwo o bu gai?

Toy luma kel lai fon yu, toy yarke gro-luma
it shanji inu pale shada iven luma de luna.
Yu-ney okos, li fai fule garbar, fai garbar in kordia may,
e me drimi oltaim, ya, me drimi oltaim om in li droni pai...

Audi gana pa espaniol e pa lidepla, kun subtitla pa lidepla:
<http://rutube.ru/video/204ab1478887795f030788642bc34d13/>

Audi gana pa hindi, kun subtitla pa lidepla:
<https://www.youtube.com/watch?v=UXIzAOqj8aU>

Si es haishi mushkile fo yu tu lekti gran texta pa lidepla, hir yu mog lekti dwa syao fasile yuma-rakonta.

In sey dwa texta oli zwo-worda es marken rude e oli kwo-worda marken blu.

«Simple texta» es originale bay L.A.Hill, piktura bay Anna Veltfort

Henk jivi-te in syao urba, bat poy ta pai gunsa in gran urba e en-habiti dar kun swa-ney molya e dwa kin-da tuhun.

Pa un-ney sitdi in ley nove dom, Henk mah swa-ney nove auto aus garaja e en-woshi it. Ewalaa ta-ney visin go pas. Al vidi Henk-ney nove auto, visin stopi e kan it duran kelke minuta. Henk turni e en-vidi ta.

Visin shwo: «Es ya prival auto. Ob es yu-ney?»

«Koyves», Henk shwo.

Visin fa-astoni. «Koyves ku?» ta shwo. «Kwo yu maini?»

«Wel», Henk jawabi lentem, «wen ye pati in urba, it perteni a may docha Jein. Wen koylok ye futbol-match, it perteni a may son Jo. Afte ke me woshi it, al ke it aspekti muy prival e klin, it perteni a may molya. E wen it nidi bensin, it es me-ney.»



Simple texta



Piter hev shi yar. Undey ta-ney amiga Paul shwo a ta: «Piter, me sal hev janmadey-pati pa sitdi. Yu lai ku?»

Piter kwesti mata, ela shwo: «Ya, yu mog go.» Ela telefoni a Paul-ney mata fo ladi se.

Bifoo ke Piter go a pati pa sitdi, ta-ney mata shwo a ta: «Piter, bye fogeti bi latif. Bye pregi chia. Weiti til ke oni dai it a yu.»

«Hao, mami», Piter jawabi e go a she Paul bay bisikla.

Pa pati ye mucho kinda. Li plei pa hunta duran un ora, poy Paul-ney mata dai a li koy chia, bat ela fogeti dai chia a Piter. Ta weiti latifem duran kelke taim, poy lifti swa-ney pyata e shwo lautem: «Ob koywan nidi prival klin pyata?»

Nu plei ba!

Findi ba 17 worda

G J E N K R E D A T
W F L Y A N S A P N
E I I R M J S C T C
R L I E I H A V L H
T O A L G K L E U U
A S R I A I A R B N
I O T G A S M I A G
M F A I H A O T A A
S I S O H E N A T O
X A Z N F S P A S B

Kwel worda es?

lbua vteiara
agami fisoifloa
atra lnsaya
haatoa kdera
reogliin ndaa


a) Go 3 yunswina: un bifoo dwa, un inter dwa, un afte dwa. Komo li go?

b) Unves pa klok 12 de no-cha zai snegi. Ob pa koy otre dey pa same taim meteo mog bi surya-ney?

c) Kwanto nuta ye in vakue glasa?

Horisontale

1. kolor de oton-ney lif e de hema
3. uupare parta de baum
4. Si oni kati baum, resti sol ...
5. baum-parta on kel lif kresi
8. kolor de saif-ney lif e herba



Vertikale

1. sub-arda-ney baum-parta
2. shefe stem de baum
5. syao baum-si
6. kolor de oton-ney lif, de limon e de surya
7. kolor de ga lao oton-ney lif